

國
朝
詩
鐸

國朝詩鐸卷二

錢唐張應昌仲甫

財賦

吳趨吟重賦

邵長蘅

九四起鹽販

九四張士誠小字

乘時竊爲王毒斂周鐵星鞭算

析毫芒刮膏啣民髓髓竭國亦僵明祖自天授作法胡

乃涼租簿定稅額畝賦七斗盈

叶

相沿三百年吳閩有

重糧吳俗喜奢淫吳民鮮蓋藏譬如酒色夫中乾而外

疆奈何吏吳者又不悉民窮

叶

春絲接秋穀箕斂終歲

忙太守急縣官縣官責厖農

叶

里正彳亍來杼軸倚空

牆隸卒猶猶來雞狗亦倉皇五日一榜笞血殷布襖襠
寬大 天子詔考課大農章銖黍不中程斥逐及龔黃
豈不愛民命且自念功名叶吏半遭譴謫民甯免流亡
我欲竟此辭援筆心慨慷

雍正三年 恩免蘇松浮糧四十五萬恭紀四章

鄂爾泰

蘇松困浮糧弊政始洪武小民何堪校蓄怨增租簿上
稽史臣書禹貢傳中古厥田惟下下九等塗泥土厥賦
六七錯實賴人工補地勢無改移瘠薄久共覩奈何溷
催科正供寓斤斧二百八十年悠悠含疾苦不見八閩

地嶺海環深阻蘇屬一縣額貢金已相伍加以漕糧艘
十又增其五不見滇與黔綿延互疆宇踰茲松陵區葺
爾何足數豈知一邑租兩省尙多許寒暑咨農毗村柚
空士女涼法自前朝抑鬱竟誰語

洪武賦已重永樂加耗連二百七十萬吳民苦烹煎宣
德聽周忱畸零偶賜蠲新澤施未久舊額仍重編增餉
始萬厯末季遂相沿反裘負益敝蠹盡難爲瓊皇朝
大一統夏殷鑒從前恩深若覆載輸納羣勉旃巍巍
二祖繼德音歲自天賜全與賜半曠典時昭宣萬邦均
愷澤豈惟吳國沾循環著爲令遐邇共嬉恬吳民勤耕

鑿安爾宅與田惟希旱潦均高下同豐年

皇帝御寶極三載恩波長念此兩郡民前代苦輸將內
無列卿請外無大吏章恩綸下九天獨斷自乾綱四十
有五萬億載垂焜煌吳民喜逾望流涕翻浪浪塗巷盡
歌舞里社喧笙簧一朝天語頒萬戶樂無央宸衷
燭藪屋大澤沛汪洋從此力田疇稼庾餘倉箱從此供
炊杵粳稻倍馨香紛紛耕饁輩顏色增輝光

微臣奉旬宣龍飛歲之首頻年歲事歉閭閻斲升斗
今秋雨暘和比戶歌大有臣嘗巡隴阡一一徧擊拍愚
民跪陳詞頌聖不去口往時賦未減支左或絀右方

將集公門何由力南畝自蒙 聖主恩夜臥快舒肘朝
光起荷耨耔直到西昀昀百萬區秩秩十千耦老弱
益加歡婦子不相詬百室旣豐盈風化自長久錢穀臣
專司所期百物阜願傾葵藿忱與民祝 萬壽

鄂方伯

爾泰

奏減蘇松賦額恭頌

馮 祝

皇帝踐阼化協唐虞臣鄰密勿風企都俞治益求治勵
精以圖綢繆補救仁惠覃敷願茲澤國爲財賦區稅額
側重獨松與蘇爰稽禹貢厥土惟塗厥田下下江湖其
瀦有宋制賦尙薄於儲元時括勘倍屨以殊明仇負固
稅視私租繼酌減難甦鮒魚泊乎晚季更竭征輸民

稠勤業不就疎蕪 國家肇造無藝悉除按圖因革未

究根株 先帝巡方軫念民痛洊多蠲貸困猶未舒

龍飛九五嗣歷之初彌縫繼述波瀾有餘東南引領庶

其及乎待澤兩載漸次規模謂方伯任卽丙司徒畀之

封疆特許陳謨承宣分陝福星泣吳保釐伊始忍峻追

呼求民之瘼撫籍嗟吁密章入告三奏天樞以剴切故

聖心躊躇親藩集議積重難拘 綸音遂沛闔澤須臾

省五十萬以安向隅粟紅貫朽豈惜錙銖四百年來無

此歡愉如大寒後忽煦陽烏如饑饉後得大有書恩膏

普被浹髓淪膚旣廣拜手功誰歸歟倘非補牘何由簡

孚郁伯膏雨不啻隨車山甫清風載披穆如明良此日
康歌滿衢山高水長九峰五湖請看兩郡化日華胥太
平萬載矢此吳歆

詔減蘇松浮賦二十萬歡林口號 黃子雲

盛朝疊有中丞疏

仁廟初巡撫韓世琦馬祐慕天顏湯斌四公俱上疏奏減悉格於部議

澤國難寬洪武仇

明祖以吳民久附張士誠疾之如仇特加重賦困之忽覩新

綸天上落 至尊從善洵如流

久以全書同帶礪

順治康熙朝屢降旨酌減兩郡浮糧司農等動以賦役全書不可更易

何期寬政浹東南

雍正間先減四十五萬 聖神天子論年萬禎

席斯民踰代三

詩百一
論蘇松丁糧

沈德潛

丁糧盛蘇松難與他郡較供賦民力疲况復增火耗每
兩五六分七八漸稍稍近者加一餘官長任所好捉輕
兼捉青官奪吏乃勦爭先植其私百私竝尤傲贏餘囊
橐充正供逋欠告緇昔康熙初大臣秉鈞要政簡民力
肥黍苗陰雨膏云何四十年萬室困陵暴充腹尙不給
焉能顧庸調天家闕財賦浚削竟何效官司懼失職加
耗議謹噪救焚用膏脂炎炎看原燎善政利漸復積弊
期迅掃閭閻一何高排雲聽誰叫

吳中吟

吳民困於重賦久矣持計者既多取之又
以私意爲盈縮苦樂不均民生困敝有足

悲者因仿樂天秦中吟
直書其事命曰吳中吟

王省山

吳郡東南雄自古財賦地漕糧百餘萬歲歲軍儲備連
年遭荒歉水旱迭爲厲民困猶未蘇取盈談何易聖人
治天下權衡本經濟上重天庾供下爲民生計二者不
偏廢義盡仁亦至持籌者何人搜括無遺利况復存私
心強爲分軒輊同是災區民苦樂乃互異追呼日煩擾
閭閻更凋敝誰肯忍飢寒束手以待斃民窮盜斯起有
法竟難治問其所由來正坐科徵弊草野困誅求海內
紛多事惟宜亟反本勞心勤撫字民飽國自安太平可
坐致老眼望時雍共遊

唐虞世

米穀

官米行

唐孫華

去年霍潦歲不熟，慄慄窮民在溝瀆。
詔書亟下有明恩，蠲減田租兼發粟。
高檣大舩載米來，胥徒里正歡相逐。
先時注冊報飢民，烏有虛名登記錄。
至竟無從辨阿誰，盈車滿擔歸私屋。
官米猶嫌飯有沙，市上公然恣販鬻。
石米七百青銅錢，貧戶無錢但瞪目。
得錢飲博競歌呼，窮鄉寡婦哀哀哭。
官家本意活災癘，徒使汝曹磨酒肉。
汝奪飢民口內餐，燃臍應照填脂腹。

穀賤行

湯右曾

江南得米如得珠關東下餉雞與豬我馬仕樞市東芻
積橐纍纍子粒俱問之市人笑盧胡家有遺穗無逋租
酤酒賽神神降巫村場擊鼓連臂呼女有衣裳男袴襦
樂哉此樂無歲無今夏小旱豆莢枯皇皇間并憂妻孥
幸天零雨困乃蘇豐樂慎勿忘饑飭大瓮小甌粟謹儲
今年要備明年須君不見堯湯水旱古來有勸農合在
循良守。

稗子行

劉青藜

婦子紛紛攜筐篋齊向荒郊收稗子晨出暮歸收幾何
一斗纔舂二升米莫嫌此物太艱難猶勝田間把耒耜

今年五月月離畢滄海倒翻瀉不止拍天巨浪浸層城
平原窪地可知矣小麥溼蠹秋禾空辛苦何曾咽糠粃
天生稗子惠子遺殘喘暫延全仗此只愁采掇會當盡
鴻鴈嗷嗷飢欲死

買米謠

方澤

漁陽歲儉水災被青黃不接食翔貴官倉出米取價廉
務要糶平貧民沾年深厥底粟紅腐買來揚簸半灰土
米少灰多那忍說此灰都是農夫血

貴米謠

周京

生小江鄉市城裏北米南柴滿城市江干柴船到如山

湖墅米船來似水別州外府或歲歉移粟移民猶可免
未若今年一例荒竝非水旱非蟲傷從四月起說米貴
一日兩日爭喧昂斗米三錢尙小斛墅河搬運如蝸蟻
如何豐稔似昨歲忽爾換作荒凶年逢人不解日徧訪
指數現在非偶然一云連年買官米 聖主憂民預荒
理往往爭買滿常平常平今悉無糠粃又云官買吏亦
買彼此牟利結不解平糶空勞大吏心飢魂骨折猶驚
駭一云海洋賫盜糧黃金百萬通豪強吏民只辦自足
計卽有傳說工包藏又云洋米誘高價愚民捐積從傾
瀉詭云他郡泛舟來公然落海喪聾啞近聞要截萬石

餘所去者多畱者寡遂令濱海諸州城蹶起倉皇奔牛
馬到處訛言訴苦衷未知孰是姑從同小民洵洵豈不
靖士子仰屋嗟窶空杭州仰食殊艱難得遇年豐尙少
安惟求長官察民隱莫廛 帝念憂凋殘

糴官米

姚世鈺

西蜀千石米東吳萬里船南風至湖口五兩翻其翻老
少起奔波典衣鬻釵鈿官家許平糴升斗爭相先持籌
縣小吏工數青銅錢十十與五五先取肥腰纏孰敢致
剖析應手提擲還百呼不領頭垂囊路旁邊歸來兮日
暮覆釜仍空然黠者補不足欲辨非忘言仍將沙參粒

得米聲暗吞。頗聞官長怒。示辱加蒲鞭。小懲無大戒。益
喜恣欺謾。北里霍家奴。瓜葛多結連。指揮市兒輩。轉運
如循環。穀賤卽騰糶。白粲椎紅鮮。餘糧到賒貸。子母生
縣縣。少已變丹砂。富將鑄銅山。問渠那敢爾。乃吏蝨其
間。平時雀鼠耗。一朝豺狼蟠。朝廷沛德澤。賑卹哀窮
鰥。忍教絕人命。資汝生財源。百姓無噍類。問汝何利焉。
何當尸諸市。使民不逢旃。

哀愚民

沈德潛

吾吳禮讓俗。胡然逞凶虓。無食訴長官。面縛乞平糶。長
官怒赫然。敲扑如賊盜。愚民忘分義。烏鴉亂叫噪。千百

爲一羣厥勢同聚嘯大吏捕曹惡草疏上陳告若輩當
誅夷迅疾不待教至今蚩蚩魂昏寐永無覺追沂無食
由此事足悲悼吳民百萬家待食在商艸轉粟楚蜀間
屯積遍涯隩商利權奇贏民利實釜竈彼此兩相須歎
歲補凋耗不知何人斯建議與衆拘常平博虛名商屯
竟一掃譬如水無源立涸看流潦三吳旣紛爭兩浙亦
召開腹枵輕國法燕雀化鷹鷂誰非斯人徒而忍刈藎
藁方今籌東南民食此最要安民在通商利倍商遠到
粟多價自平賑荒有成效今 皇拯做急因勢利以導
霜雪回春温下土陰雨膏請看無知民同心慕忠孝

百一詩

又

食爲民所天重穀本王政吳民下下日况處繁華境年
來旱澇餘十室九縣罄而何奸牙徒手握貴賤柄一石
一兩奇價直市中平聲出洋四倍之囤戶互相競海洋
紛寇賊毒惡類梟獍有天無地處劫掠逞剽輕金多闕
糧粒孽芽未敢橫一朝通內地種類交手慶奸牙爾何
心豢寇奪民命官司無如何伍伯空伺偵此輩本么麼
夙秉貪饕性同爲版籍民豈不畏甲令敢爲民食蠹根
柢那可問如癰匿肺腸詎識毒氣盛久久終潰決軀體
受其病斯意當語誰合我憂心柄

稞麥歎

自松州歷章順所轄之寒盼商巴祈命及

外之阿格甲凹鵲箇郎馱上中下阿壩
十土千百戶諸土境迢迢千餘里戶口數
萬其間有產稞麥者有絕無者作詩記之

查禮

松章有稞麥格凹無稞麥鵲箇無稞麥郎壩有稞麥窮
邊千里遙未能一例覈天時固不同地氣亦迴隔六月
尙隕霜冬月聞霹靂晴少陰翳多雨雪昏朝夕羌蕃生
此間不復歎土瘠有麥聊充飢無稞任乏食竭來目覩
之教養實吾職急欲代之籌又少萬全策功難與天貪
勢難與地敵誰云中與外處處宜稼穡

示吏

張五典

社倉遺規傳紫陽其人經畫行其鄉出入不言屬胥隸
此中意旨微而彰後來優漁自當局壯哉鼠雀多耗亡
里黨相推及大戶有借牧令爲隄防州邑案吏逞巧黠
就裏公然持短長里豪蠹吏共利藪驅蝥狼狼相扶將
一二村耆或自愛刀筆立與生疣瘡展轉託名恣驚擾
要平聲輸泉布羅酒漿逼令私售滿慾壑豈勞破費開私
囊歲久沿襲儼成例廩虛一掃無秕糠汝曹伎倆類如
是卽時指屈安可詳長官於人亦平易須知便腹貯剛
腸

穀貴歎

胡窩年

東吳去秋書有年。瀕海之地樹木棉。木棉賣盡充賦役。
官長不用加蒲鞭。何爲穀價日騰湧。一斗五百青銅錢。
曾聞隔郡大苦旱。赤烏飛焰烘遙天。幾番插秧秧盡死。
秋郊慘慄生荒煙。此疆爾界共憂樂。指爪負痛心熬煎。
我行侵晨入城市。市市間爭糴聲喧闐。少壯奔趨覓升斗。
老羸躑躅無由前。販夫販婦汗成雨。得錢稍稍喫粥饘。
大開社倉糶官穀。謂濟涸鮒游巨川。豈知價減量亦減。
糶利乃復同市廛。餘糧盡飽碩鼠腹。胥吏日肥民日朘。
今秋倘更逢儉歲。百千萬命溝壑填。吳郡昔稱富饒地。
外強中乾劇可憐。輶軒過此應下淚。江頭尙有流民船。

嗚呼江頭尙有流民船

雜感
詩
詠倉儲

張雲璈

倉儲所積穀本爲不虞設有斂必有散取盈不取缺推
陳而出新其理自可澈遂有不肖吏以此肆饕餮假公
濟其私直以市道揭欲將此贏餘用蓋彼折閱大吏懼
其擾彈章事遽列出納毋許擅甯俾久局鍋從茲任紅
腐謹守以自潔無復轉環計但事補苴說偶一思變通
肘已從後掣民力未云紓官力實已竭有用化無用廢
食竟爲噎

國戶歎

吳蔚光

食葉則有螟食節則有螿吁嗟兮閭戶實乃民之賊取
禾三百廛安坐不稼穡較量極合升蓄積過萬億所望
歲歉收斗米貫錢直市價一騰踊頓取數倍息聖人重
倉儲意在活邦國或以勤補助或以權假貸誠恐災洊
臻草野多菜色此輩至貪吝設心復何刻居奇巧射利
惡似含沙蜮其名託質遷其罪勝倍克元氣相流通往
往爲爾塞庶幾怒雷霆昊天予誅殛

出洋米

吳蔚光

出洋米出洋米衆人趨利如流水大爲之坊民猶險何
况水多防亦無出洋一日十餘石一月出洋已數百內

地石約二千錢出洋石至六七千海口卻從何處出徐
六涇口稱第一福山白茆許浦復有之牙行囤戶販商
游食地保汎兵津吏營弁各各肥其私或日買三升或
日換四斗僧觀尼庵窖藏數椀燈紅照沙上田肩挑背
馱齊入船小船飛渡大船接大船得米小得錢連朝價
昂過一倍市口悉推鄰縣買不是太倉卽上海太倉出
洋有劉河比聞上海出更多官責牙行與囤戶囤戶牙
行狡如鼠不糶不糶未浹旬小鄉鎮多絕粒人飢民盡
怨官禁米米禁纜張旋又弛旋又弛可若何年來海久
不揚波米船萬斛席面過官禁不如私禁好其奈奸徒

易滋擾出洋米齎盜糧爲利起不禁將何所底止禁自
衆人心上始

貴米謠

魏成憲

穆門徵君貴米謠前戊辰紀乾隆朝斗米三錢尙小斛
其時已歎鴻嗷嗷六十年來甲子轉價倍翻云昔年賤
今春蠶麥皆有收昨歲占豐炊玉徧如何梅雨偶然多
且暮喧騰關市河特起官倉爲平糶沿村乞米爭嘍咷
齊民藏蓋家家無甲第猶空甌石儲習俗好奢不好儉
纔逢小歉便飢驅近閩早稻登原隰米船江浦如雲集
稍喜新秔價漸平辛苦盤殮珍粒粒有秋可望人心安

還怕風潮秋向闌未雨綢繆煩長吏先疇稼穡念艱難

施州樂府 沽白酒 平市價也

詹應甲

不平米價平酒價人笑長官酒力大平生麴蘖本無緣
飲醇之交都屏謝施州土瘠山不腴所產稻穀只一隅
肩挑背裏假人力出境尙喜無舟車運穀艱難運酒易
販夫爭致千金利四鄉到處營糟邱但有酒池無米市
官如示禁到閭閻翻言販酒非販鹽官今爲汝行法令
酒旗大書酒家姓價比尋常十倍低不出三日酒槽罄
酒槽罄飯甑開酒傭星散米販來

西洋米船初到紀事

阮元

西洋夷船來。羶毳即呢也。可衣服。其餘多奇巧。價貴甚。珠

玉持貨。示貧民。其貨非所欲。田少。粵民多。價貴在稻穀。

西洋米頗賤。

僅有內地平價之半。

曷不運連舳。夷曰。船稅多。不贏。

利。反縮免稅乞。

帝恩。

余奏免米船入口之稅。仍徵其出口船貨之稅。准行米船。

來頗速。以我茶樹枝。易彼島中粟。彼價本常平。我歲或

少熟。米貴。彼更來。政豈在督促。苟能常使通民足。歲亦

足。

以後凡米貴。洋米即大集水旱皆不饑。

捋稗行

劉侃

無雨禾盡枯。幸有萸稗熟。翹然起平野。其勢壓苗族。貧家攜囊來。手捋動盈掬。圓粒細珠玑。舂碾煮成粥。腸空

覺味增珍視同嘉穀急呼妻兒前分勺共果腹皇天不
絕人畱此拯溝瀆

米貴謠

趙元紹

大雲峩峩似山矗嗟哉陽九逢百六石焦金爍土龜坼
野火翻飛上茅屋榆皮已盡草根枯十丈谿河變成陸
晨起愁看日影紅晚來幾見炊煙綠去年米賤等糠粃
今日糠粃貴如穀君不見千錢一斗萬錢斛富兒色喜
貧兒哭

蕎麥歌

丁卯亢旱時作

潘際雲

田中焦河底坼南風長吹烈日赤老農望天惟白雲不

種黃秧種蕎麥種何所有典衣買一斗用力如耕青
石巔急圖已落黃梅後三日下麥種十日望麥苗願把
農夫千萬淚變成微雨灑平皋淚亦不能灑雨亦偶然
下入土纔深半寸餘兩瓣青青已殘夏縣官來勘荒僕
從紛輿馬山坡麥祇一尺長境內災稱五分下父老長
跪言糠粃朝夕缺盼得蕎麥花如雪多少農眸眼流血

麥賤

吳振棫

春前憂雪少春後憂雨遲雪少麥根淺雨遲麥苗萎今
年麥大熟雨雪無愆期腰鎌弗敢後露積多如茨重羅
白勝雪連展甘若飴貧家得飽啖婦子聚而嬉鄰翁起

太息太息前致詞年運有往復豐歉有轉移官倉鮮實
貯貯者或成灰旱潦一不登賑贍無所施世無慮與扁
有疾當自治吾儕謀蓋藏囊益皆可資務禁豐歲奢稍
療凶年飢不見三年前榆柳皆無皮

米賤謠

歲豐米賤貨錢耕種者
生計日蹙感而賦此

何其偉

耕田賴天倍收米不如天公多雨錢錢多事事皆可
米多換得錢幾緡前年斗米價六百今年石米無二午
去年十畝四石粟今年一畝仍四斛仍四斛減半價無
二千錢更借借錢了債債益多典衣鬻器殘冬過明年
更賤將如何

紅稗吟

陳雷民困於澇歲薦饑黔陽劉芾林蔭棠宰是邑憫之黔人種紅稗如種穀然致其

種教父老種歲以大穫又設社倉爲積聚計按
汜勝之書曰稗旣堪水旱無不熟之時宜種之
以備凶年稗中有米壽取炊食不減粟米又可
釀作酒稗之利亦豐矣世以其似蕒害稼屏之
過矣稗宜于黔復宜于豫使廣其傳俾山陬海澨咸殖利不亦溥哉徐寶善

有稗有稗于黔之陽其赤如粟兮其實如梁旱弗瘳兮

澇勿禳屢豐年兮家穰穰

解一

媿媿莘野湯湯大河大

河湯湯汨我陵我阿萊頌犁鏡縣馨而嗟疇降我康兮

嘉禾孔嘉

解二

厥惟賢侯我民我飢貽我赤稗匪糲伊

粢翼翼之稗惟侯暨之稗之翼翼惟侯粒之

解三而粟

斯斂而食斯籩立爾社倉有筥有稷饁斯粥斯徧食爾

德兮爾公爾侯育我罔極兮解

貧米歎

夏之盛

捨貧米計升斗富者輸粟貧餬口米肆券劑百千剖今
歲歉收難濟度幾家積財減施予盈升可乞累斗無望
澤不均貧民怒貧民爾勿怒食貧固苦富尤苦君不見
嘉湖抗糧租莫徵竭蹶尙須籌 國賦

買米謠

本照

我作買米謠時維歲辛酉記得去年秋梗稻徧隴畝蝗
興并旱潦損耗卻罕有胡爲今年春石米四兩九蓋緣
倉儲空軍餉方掣肘富戶利盡藏紅朽苦積守商賈操

牢盆大力負之走爭糴價遂昂居奇日益厚負販及傭
工經營不餽口辛苦得微值千人買升斗沿途如乞丐
覩顏向豪右趨趨甫及門豪奴但搖手歸來聞號咷合
室仰空缶嬰媿及老弱枯瘠似衰柳秋熟望尙遙欲活
焉能久所以無知民痛心而疾首糾衆索強糴開倉發
糴甌遂成搶攘風盜賊如林藪官吏申法嚴差拘不勝
數里魁及博徒一一加械杻嗟爾蚩蚩頑作孽實自受
貧富各有命豈可妄劫掊我作買米謠以俟采風後牧
養實有徒誰當執其咎

鄧顯鶴沅湘耆舊集按語曰嘉慶辛酉有長沙姦民喻次三倡

取強糴搶劫之案湖以南郡縣村落間里魁博徒聞風而起當事重懲始稍斂戢道光辛巳間吾縣及益陽此

風猶熾近武攸溪峒間假匪米爲名至於聚眾戕官竊以爲治亂國用重典非武健嚴猛不爲功邦人君子莫肯念亂不勝悠悠我里之懼也

漕政

官倉行

唐孫華

今年窪土半汙萊惟有高原存秬稌井賦常憂不足供
敢望私家餘二鬴俄傳府帖下徵糧稅長閭氓走旁午
月令曾聞較斗甬周官嘉量銘辭古民間出入尙須平
何況徵收自官府斛式製自崔中丞頒行實由元世祖
至元間中丞崔彥始製斛式
日狹底廣至今用之不改底寬口窄有成規早禁淋
尖戒多取倉斛多浮滿俗謂之淋尖此式遵行四百年一旦奸胥敢

變侮爭說今年斛製新上下均平如甌甔斛面高堆輒

數升悉委倉夫操量鼓

曲禮獻米者操量鼓孔疏鼓量器名東海樂浪人呼容十二斛

者爲

胥使倉夫如使奴指麾總奉胥爲主民間粒米重

於珠載向官倉賤如土。早時賤價胥折乾盡刻窮民膏

血補胥富全看金穀輕民窮甘受鞭笞苦狼藉倉場填

淤泥穀飛眼見都成蠱

左傳穀之飛亦爲蠱

可憐小戶闕晨炊破

竈無烟轆空釜

盤糧行

楊錫紱

國家一統車書全萬年之鼎定幽燕根本重地先儲峙
歲支不下百萬千輓運東南資軍力分設衛屯相轄聯

樞密重臣出專閫控制七省淮最便慎重天庾防漏卮
高張大纛列河堧風帆銜尾兩岸集丁旗悚息聽簽盤
軍門動輒守成例百弊乃起相拘牽不然耳目成偏寄
威福往往移中權牙爪猙獍胥吏蠹兼以鬼蜮相因緣
吹癥索瑕各有託大抵谿壑須塞填衆中簽役尤辛罄
盈縮在手無繁言傾囊稱貸免鞭扑膏血已盡猶垂涎
百萬軍旗咸坐困有口未敢鳴煩冤年深歲久相沿習
弱肉恣啖誰其憐使者銜 命任轉輸 九重德意先
傳宣才拙敢云事釐剔庶幾一切繁苛捐嗚呼庶幾一
切繁苛捐元氣培養何時還

起剝行

商盤

古城墩前春水涸，楚舸吳艘齊起剝。募夫一名給百錢，百夫方可挽一船。沙淤路塞行復止，運丁愁苦汎兵喜。治河濟漕非緩工，河流不濬漕不通。起米難行還起貨，過關又恐遭巡邏。明年此地仍滯留，何不改造飛雲舟。

梁王筠輕利舟詩君侯
飭輕利搖宕邁飛雲

徵漕行

鮑鈺

國家制漕運，歲賦額有常。官軍皆仰給，遐邇同輸將。一石凡幾鍾，萬斛連龍驤。年年十月交，州邑齊開倉。三冬例徵兌，叢脞晝夜忙。符檄日紛沓，令甲晰毫芒。青腰白

臍禁吹求爭較量憲府氣如龍丁弁貪如狼縣令賤如
狗胥吏驅如羊嗟哉此黔首疇敢相頡頏

徵漕歎

袁 枚

沐陽漕無倉水次在宿阜去縣百餘里官民兩奔走富
者車馬馱貧者箠篋負展轉稍愆期鞭笞隨其後北風
萬里來臘雪三尺厚泥塗行不前老幼足相蹂今歲旱
魃災產穀半稂莠粟圓而薄糠零星他郡購未來苦無
穀有穀苦難受檢穀如檢珠重疊須春日粒碎晒相喧
色雜嗔相詬嗟哉我窮民歷歷數卯酉來時一石餘簍
完盈一斗天雨不開倉小住日入九攜來行李資不足

餽其口官怒呼吏來命杖撻吏首收穀爾太苛爾命胡
能壽諸吏跪且言公毋罪某某旗丁古門匠習俗久相
狃米色稍不齊叱吏如畜狗太府命監收所來亦矇矓
委阿無定詞調停兩掣肘此時收太寬臨時安所咎縣
官笑且言爾毋強分割我從通州來斛糧萬萬數糠砂
半相和俱已蒙上取我食翰林俸陳陳盡紅朽何得此
旗丁需索爲利藪言畢旗丁至獐獐貌獐醜視米噤無
言仰面嚙欲噬我因思吏言此事誠然有更有持斛者
有意與苦手播弄作浮萍掃除恃箕帚長官察吏嚴雙
人二五耦披羊裘而釣誰不識嚴叟衆吏迎以入勞金

兼酌酒此金此酒來毋乃非民否縣官自語心爾已爲
民母甯受旌丁嘆毋使民守久甯失邏者心毋使喪所
守持此徵漕歎願以告我 后

南漕歎

又

握粟鋤粟十月征大車小車軋軋鳴雲連萬甬兩遞運
李斯如鼠倉中行倉氏庾氏聲嘈嘈搜粟都尉意氣豪
利之所在天亦忌大官防縣如防妖牽驢磨麥矐其目
憎鳥竊脂繫其足黃紙朝來刮升斗朱符夕下封官斛
待暴日擊重門柝不管糞黃與魯卓水流汾澮其道壅
萬弊雜出仍無窮或需精鑿強揚播兩三誦作十回春

或借一鬩分先後富者收早貧磨礱或書官符訛多寡
塗鴉難辨斗檢封廉人別奏來重重伍符尺籍生蟻螻
共飲倉中一勺水頃刻白粲成青銅可憐鄉氓半樸魯
小人容易爲沙蟲明徵法錢人所見暗教折帛何所終
物不揣本齊其末事方在北求諸東我欲大聲呼大吏
胡不早辨賢與忠古人信人不信法將欲治彼先治躬
捐除文網道以德如水沃雪草偃風持其大體去已甚
官和民樂聲雍雍吁嗟乎君不見人肝代米古所記察
察爲明安得劉宏十女孀

納漕行

手上良

朝上倉。倉門如蟻舟。如鯨。暮下倉。倉差如虎人如麀。國
中本是不脛物。焉能朝進而暮出。頭馱不納末。厥收誰
識。潮毛與乾潔。大吏撫吳恤黎首。先頰鑄斛烙升斗。早
稻晚稻別高低。東鄉西鄉辨好醜。誰何使者貂。袿襦日
食有酒雞羊猪。上腰米色驗米樣。漆盤灰匣銅提鑪。上
手標籌下手退。吞聲瞪眼相唏噓。大言若衆毋擲揄。若
聞官府清糧儲。滾滾但要盤中珠。不爾何以供天糈。北
風吹塵飛雪溼。中有老農垂首泣。僕家家無半頃田。前
月已下催征帖。今年秋霽夏無雨。收割青紅雜成粒。大
男小女上礮牽。新婦老妻下耰拾。十番篩簸九番搨。今

朝圭簡明朝合八口之家三月工可以如數親交納打門洵洵吏呼怒堂上朱籤捉欠戶。

上倉謠

微漕米有定額而浮放者藏何禁包攬者漁私利無所控訴者此小民耳爰作是謠

吳蔚光

朝上倉暮上倉泊舟倉前三五日天寒歲晚冬夜長大戶千石中百石小戶多止升斗糧糧一斗加數升糧一石加數斗堆尖如山心未足平斛響搗復何有大戶包攬先入廩園中二米低且潮小戶米縱乾圓潔篩之扇之八九折莫呼官官不聞閉衙召伎羅芳樽寘從奔走如兒孫莫呼吏吏反嗔漕承記書豺虎羣開口直可將

汝吞早收一刻漕賦辦加四加三民亦願腹中已飢身
上單更貸私錢倒版串歸家愁語妻與孥壞竈破屋空
嗟歔嗟歔復嗟歔官吏真何如君不見我 皇恩德及
四海緩征發賑還蠲租

吳中漕運詩

爲李蔭原先生作

周有聲

去年吳漕輓不前今年漕速如飛鷲心知今年必有此
究問輓者胡由然就中老人頗解事相看匿笑還私論
自云牽挽代丁力年年僦役吳江船若曹此役實大利
丁弁依倚同猱猿厥名兌費費何等漕司胥吏同肥羶
餘皆乾沒縱自飽妻孥粉黛僮衣鮮淫朋宵晝競荒宴

擣菹博塞誇豪賢一船白蠟恣貪取百不足道多盈千
縣官何能致數滿但藉膏血填坑淵相循敲扑故事耳
假此亦得加削脛運弁橫索十一二尙有攫者何堪言
邇來漕弊亟搜剔此習固結猶遷延監司催船船不發
白眼坐對公喧闐豈無官書罪驕悍內荏安得施荆鞭
今年監司大夫李冷面未許包苴千扁舟按行到州府
縣吏無敢供盤餐松江白糧更不易往者一闕撓奸頑
公來事事盡親綜餽遺路絕徵無煩縣官丁弁都縮手
敬受委諾爭趨先就中大猾亦帖耳帆檣渺渺馳風煙
何曾支訕有不繼便覺奢縱無因緣我昔事公備任使

信公懷抱冰淵堅尤驚任事獨侃侃衆所退儒公能肩
公來我記祖諸道要語一一心銘鑄謀身利害匪預計
委蛇何必皆名完果然舉動中窵要人初駭愕旋安便
更持三議白大府先生以三事請之中丞謂官吏浮收
運丁苛索刁民抗輸皆不宜姑息云
漕弊可肅漕政全公誠竭精計民事敢竝輿論書之編

記道光戊戌江南徵漕事

江南米價一石銀千七
八百文五十年來所未

有也惟價不及往年之半未免穀賤傷農乃旗
丁橫索帶費不少減致征收本色有加兩三倍
者折色有加三四倍者竭終歲所入不足以供
帶費之傷民甚矣既爲文三篇以陳疾苦復爲
此詩以告當事

陳文述

江南頻歲遭荒歉茆屋貧家餓死多畢竟慈祥屬天意

也緣感格在人和路旁米市家家足江上租船日日過
五十年來無此樂含哺鼓腹聽衢歌

貧民歡喜農民苦穀賤傷農信可傷祇爲尖丁苛似虎

遂令漕總狼如羊

糧船以尖丁爲主橫索者尖丁挾散丁爲之漕總與尖丁台而門丁左右

之民不聊生官亦受困矣額征本自前朝重

揚州十八倍於淮安前代之流毒也折色何如往歲強

蘇松漕額倍半於常州三倍於鎮江十六倍於甘上債

臺填慾壑可憐循吏祇蕭黃

太倉令黃冕元和令蕭琳不忍多取貸債以給郡費各有情形各自知莫憑權勢任施爲妻孥衣食原難缺

飲博猖狂恐未宜竟使南漕成痼疾空期北壩作良醫
持平始得平安過江海應難實漏卮

旗丁索費藉北壩爲口實其實州縣

之所出不盡歸丁丁之所入不盡歸北壩也北壩
索丁亦有太過當處去其太甚是所望於當局者

敢比長沙策治安三篇文字寸心殫預防曲突談何易
力挽頽波事本難白傅詩篇餘諷諫杜陵涕淚祇心肝
杞人空抱憂天意伏枕長吟永夜歎

轉漕行

轉漕自明永樂會通河成海運遂廢國朝因之至于今四百餘年矣近時黃河屢

決上流河日淤塞歲以爲患蓋海運莫急于此時也至風波漂溺之患成化時邱濬萬曆時王宗沐言之甚詳海運旣通文武不得不專事巡緝使海氛肅清是又出于前人利五害一之外者余懸考漕運作此以待采風

王槐

輓輸軍國計建策宜萬全有明自成祖遷都定幽燕東
南財賦入轉漕惟艱難入海畏漂溺陸走苦役繁壹志

理河運南北愁互延傳有老學究

老人定議疏源泉抑

白英

汶入南旺中流分沂沿

過柳汶水入南旺至南旺而中分分十之四南流以屬徐沛分

十之六北流以達臨清

置閘纍數十水旱期無愆舳舻銜尾來葉

葉風帆懸成效三百載我

朝復因焉豈知太平慮未

可垂不刊轉運會一河如人有喉咽一日不下咽其禍

不可言河身况淺狹兩舟不竝前一夫苟大呼萬櫓爲

棄捐一舟苟觸損千櫓坐此遭雖云省民力得失難兼

權總衛置百十旗軍籍萬千建造每雷動疏鑿恆經年

行糧坐有食科索通貨緣陰雨愁溼漏淺澀勞推牽一

石供

天庾已費三石錢近聞黃河水上決下苦乾每

於扼隘處淤塞成埽田雲屯集畚鍤日作夜不眠無功
但有罪手足空胼胼下策決河灌計利不計患頗聞數
郡民一夕淪深淵醫瘡剜心肉苟且且夕安所費又鉅
萬元氣何由還害十當變法此理須推研海運有故道
島嶼分灣濼膠萊已垂成相度功宜專元人開膠萊河在海運舊道之西垂成而廢利五害則一發論聞先賢見王宗沐疏造舟自有法
停泊亦有川占候苟無失那畏波連天三春風力柔往
返輕而便數旬已畢事繁費半可蠲次復理河運疏通
無梗湮近海海可渡近河河則先坐收河海利弗使困
一偏豈惟便轉輸兼可清盜源上紓宵旰憂下息民

力殫漕儲 國根本作詩俟臚軒

開倉謠

孫源湘

仲冬望日官開倉大戶小戶爭完糧老者幼者蹙躄者
或載或擔或負囊朝報完不得斛夕報完不得斛飢腸
雷鳴寒起粟急折餅金賕吏胥一石願加三斗輸吏胥
瞋目語今年官府清廉焉用此羨餘城頭蓼蓼雨更鼓
黑夜喧傳叫糧戶官來前黠如風吏侍旁怒如虎大家
動斛用力舉狼藉不辨泥與土尖如山落如雨一石米
斛五斗五微聞旁人稍稍語今年官斛大於釜少一升
百錢補少一石脫布縷天明歸家見妻子猶幸存得兒

與女

太守來

又

太守來來蘇我民我民共仰太守仁冤苦不得上訴公
堂聞昨日完糧到倉口一石多攜三四斗縣官嫚罵道
不足耗羨今年外加六不盈此數糧不收黑夜擔歸雙
淚流明朝破衣入質庫不足還須脫布袴道逢儒巾人
攘臂爲不平與其飽官甯飽紳盡寄鄉戶歸紳名彼雖
爲利非奸義猶勝官吏多欺凌我舍我利圖我甯惟望
仁者爲澄清昨聞太守來夾道歡呼迎太守爲民殛貪
吏太守爲民治漕弊呵騶遙遙下倉門有吏持籤夜捉

人微聞旁人道名姓執縛都是儒衣巾吁嗟太守來來
蘇我民我糧依然我自完加六不止加七完但見儒衣
銀鐙跪堂下太守下堂齟齬迎縣官

恤漕

屠倬

賦稅不可缺追呼亦可憐粒粒倉中粟小民膏血煎江
南賦尤重例由勝國延民已習而安科則例所編取之
不爲虐所貴長吏賢奈何有折色石米錢五千漕丁猛
於虎抑勒吏使然其名曰幫費千金開一船丁則固已
虐吏實任咎焉侵蝕到隸胥况以私橐先我 后付我
民俾之使生全祿精 后所詔撫字吏所專曾不我民

恤而忍加笞鞭，催科甘下考待罪。及四年民隱敢不書，
上有咫尺天。

催租行

鄭璜

吏催租猛如虎，官催租黠如鼠。如虎吏可飽，如鼠官何
補。吳江漕十萬，不論歉與豐。幫費一十萬餘兩，一一取
給於其中。少取官有累，多取民更窮。佃戶不還米，捉將
官裏打欲死。糧戶不納糧，知縣索米坐大堂。幫費無著
落，軍船開遲官禍作。但願五風十雨百穀熟，一畝歲收
米十斛。乃使官吏歡忻民不哭。

雜詩
之一 論漕夫

王文瑋

國家歲轉漕何止十萬夫巨艘銜尾進兩眾忽睚眦腰
藏利匕首殺人血不濡失一必償兩彼此交相屠縛屍
棄江底死者曾無辜禍竟類蠻觸衅或由錙銖此輩難
措置急則皆萑苻養癰既不可當事宜良圖

輸租樂

彭兆蓀

輸租樂農人不樂士人樂二頃不須田負郭卻向太倉
充鼠雀杳矣均田圖茫然手實法某乙租庸移某甲勢
與長吏相傾壓長吏無如何逋布纍纍多公私各有利
遑復相譙訶獨不見農夫擔負官倉口顆粒何能角升
斗多寡一任量人手遺秉滯穗皆入宮鳩形婦子吞聲

還

漕倉行

薛時雨

東南財賦甲天下之江上腴推嘉禾冬收春運有定制
按在計畝無差訛漕倉建立水之涘閘閔高伉形嵯峨
厥口各自分監守編排字數鮮蹉跎鱗次櫛比備儲蓄
如翼如革如蜂窠歲逢大熟官吏喜大張文告嚴催科
誤漕漏課罰不宥毋以良善罹網羅民遵功令並量穀
逾期輸納防譴訶木槧戛戛晝不息石碓兀兀深宵磨
紅鮮白粲籽種美香秔熟糯精鑿多鯨揚旣浮若珠玉
盛以囊橐裝以籬一年血汗獲秋稔負載出門淚滂沱

萬舟銜尾排水次，篙櫓填塞防。牽拖望門投，止不得入。
漕倉咫尺如天河，胥吏耽耽作虎視。探囊出米親摩抄，
七御入鑿茫弗辨。正供寬恕耗羨苛，豆區釜鍾各有額。
嘉量上頒平不頗，如水忽淋勢趨下。堆尖高可青峰摩，
嗟爾窮民苦無告。煎迫慘若投餒蛾，急覓返噬輒釀禍。
洵洵糾衆尋干戈，牧民乃與民結讐。心勞政拙古云何，
其中亦有狡黠者。慣倚刀筆爲斧柯，擇肥而噬擇弱食。
漕倉盤踞等行窩，抗官玩法肆包攬。論以重辟理則那，
蚩蚩之氓實可憫。升斗胡爲興風波，天寒歲暮屐未足。
催收徐待春陽和，金穀典守下吏責。日與斗筲相切磋，

敲比未忍加鞭扑拊循期可甦痒疴圍爐待雪乏清興
偷閱吮墨吟長歌歌終倉吏請視事升堂驗斛鼓吼鼉

納稅行

徐堂

涼風刺肌雪沒足載米輸官珍數斛置場不得入厥口

盜賊須防共屯守

米未驗者置內場外場不得徑入厥

昔官索米米在田

今米來倉官索錢吞聲負米入城市米賤錢荒價不起

以錢抵米錢數短稱貸豪家數纒滿醫瘡剜肉大可憐

今年過去愁明年請將此田沒官府叩頭乞官官不許

紀事新樂府

婁縣漕書趙靜甫奸猾用事善蔽官長邑民田賦陰受其害父充縣快甚

貧靜甫暴橫致富已退卯朦捐縣佐猶貪其利陰爲把持致有七寶區之事擊斃十七人實靜

甫一人主之而優游事外眾債焉
爰行爲新樂府十二章以紀其實 葉 蘭

五五斛

倉城冬月倉廩開紛紛糧戶擔糧來總書高踞眾役侍
米千百袋如山堆費足醜米佳費缺佳米醜吁嗟米不
會張口挑剔還經記書手方深大斛四役扛搯盤另掣
斗許強部殞鐵斛棄牆側備而不用猶餘羊君不見十
石卸成五石五糧戶吞聲暗叫苦

買加頭

五五米卸斛挂籌斛已足額添加頭加頭之數不一定
四三五六惟所命不須斛米但準錢每一數加九百正

苟不承命卽嘗訶前斛之米委逝波。更嗾豪差把人捉。
不顧紳衿恣毆辱。博黃學松人善儒任茶毒。併米重完再
加足。再加足。休延遲。通盤計算猶便宜。若使乾包盡折
色。錢十千餘抵一石。

匿膳黃

聖恩寬大赦賦緡。布告天下咸使聞。省頒膳黃逮州縣。
嗟爾鄉民未經見。鄉民未見猶可言。可憐追比逾繁喧。
雄鴨雌雞短頭布。不滿豪差一人賂。扛籤四出催完輸。
鬻兒賣屋紛無數。比及膳黃遍鄉貼。小民無肉但存骨。

賣荒謠

偏災流行無歲無奈何據此爲利圖買荒變易荒與熟
權總惡書任翻覆問渠荒價夫如何石賦賣錢兩貫多
嗚呼昔日之荒委天數今日之荒只須做彼真荒者無
餘錢敲扑追呼向誰訴荒貲所得非入官私囊滿購田
盈千田雖盈千賦不完書田樂得逢荒年

橫加白

肇慶
之端

七寶區盡荒瘠不完糧祇完白地少禾稻多木棉雪朶
盈枝幸堪摘書言旣免糧其白價宜益白銀每錢錢五
百小民竭歷勉供億去年風雨嗟漂搖花其不滿一寸
高已慨年荒忍寒沍怎奈惡書更加賦就令五百猶難

供况復益以一百銅。欲納無貲。但觀望罪以抗。逋大懲。創悍役聲。鷲雞犬愁。飛牌火急。神魂喪。幸閭縣主心慈。仁曷不匍匐往乞恩。

一炷香

香煙繚繞霏長途。鳩形鵠面同爭趨。趨入縣衙盡蒲伏。手持炷香踞地哭。是時縣主西赴倉。肩輿亟返坐大堂。惡書聞之急呼眾。各持械潛周防。官問鄉民爾何泣。訴言白價昂難納。但求諭總減其半。三百一錢願供給。縣主聞訴心惻然。云當曉示安窮。屢書伺案旁。兀無語。兩目稜稜怒如虎。

白扁擔

縣至退扁擔來惡書喝打聲如雷挑糧夫集如狼豺白
扁擔長六七尺上書挑夫姓名識橫梢直砍盡辟易或
折其脛或斷脊是時雨急天闇昏縣門堅閉難逃奔一
人洞垣首甫出擊腦漿迸身翻踣縣卒喝止喊聲破已
見血流滿堂宛平明復報東門中一尸碎膝仰街臥

公堂屍

公堂公堂今成北邙積尸累累如羣羊一尸項腫色青
紫雙眼睜睜噤牙齒一尸瘦削微有鬚腰圍血漬紅模
糊折臂一尸枕其股隻拳猶握斷香炷門側一堆橫八

尸蓋以蘆席形未知階下六尸亦蓋席席開略見婦人
爲嗚呼昨日堂下跪今日堂下僵瞥覩此狀心摧傷其
餘逃竄雖還鄉近日頗傳多死亡

城隍來

縣場日暮風悲酸吹人慄慄毛骨寒昏黃月黑訟庭悄
牆角時聞鬼聲嘯嘯嗚嗚西復東嘯嘯者雌嗚嗚雄
左右居人駭相警行客聞之輒歸病冤氛慘結成陰霾
解禳特請城隍來請邑城隍神供城隍之神正而直肯
享牲牲聽驅斥明靈不受奸奴誣再拜稽首無乃愚爲
民則欺爲鬼恐惡書此時神亦悚

一朝發

初爲猾吏後蠹書庸奴蒞利人不如錢漕鉤稽諸弊作
白鏹纍纍入囊橐食饜梁肉衣綾繒居然族譜通簪纓
堂前賓客日滿座不是希顏卽承睡一朝驟富忘昔窮
只嗟不逮娛乃翁乃翁往日飢寒急一貫替人打三十

竊名器

富則思貴人常情其如例格不可行娼優隸卒有明禁
若輩登仕羞冠纓惡書自是好身手接木移花掩先醜
入貲竟竊一命榮貳尹頭銜頗自負起而攻者羣紛紛
謂名與器難假人郡庭學署有呈遞側聞有客中調停

君不見竈下養中郎將爛羊頭關內侯漢時流品已難別而况夫夫會要結

且彌縫

朝傳省垣提總書郡人或恐風聞虛暮傳省垣提總書羣言此孽應殲除乃公自覺罪難追默數惡端早盈貫且憑智計工彌縫惟冀上臺免提勘書愁無賄難干情我知有賄無路行方今烏臺明鏡徹詎容魑魅潛其形嗚呼古人有一言其理深且旨千夫所指不病死爾乎胡爲不聞此

原跋曰浮收加賦縣主何以任其暴橫若是以初履在弗能洞悉其弊彼善蔽官長則謂率由舊章耳所

謂清官難逃猾吏也聞縣主去任時流涕語曰一官不足恃何以對此十七人耶皆我誤用人之過也又曰此詩傳至都下言官據此入奏欲藉平反趙書按問如律眾情稱快道光二十九年四月記

澹澹河篇

魏 埜

澹河十日水初涸縣吏徵夫供力作澹河每歲百餘里
荷畝持畚苦疏鑿白頭老叟遇河淚自云耕種傍河水
淘河工作困遷徙官糧刻減餓欲死餓欲死不足惜堪
恨年年苦工役就中舞弊由胥吏私飽官銀恣吞蝕遂
合草草了二程河開一尺報十尺十尺河水深一尺河
水淺上下兩相蒙工役歲難免不然一年疏濬可十年
何必年年事調遣

輸租行

閩高景芳

驢馱口袋牛挽車天陰防雨宜重遮農人惜米如珍寶
官府視米如泥沙不辭淋尖與加耗早賜收取容歸家
願存升斗買麤布聊與妻兒補破褲盡情傾倒實堪憐
羞澀反遭倉吏怒驅牛出城口吻乾無錢沽酒當風寒
辛苦回來夜將半細嚼筐中草頭飯

漕政補

南漕行

范元偉

收漕累在民兌漕累在官我舊吳中客爲君言其端十
月由單發下鄉先恐喝今年米色要乾圓堂諭煌煌違

者撻屆期聞倉開滿載赴城來今日不收又明日寒風
颭面撲灰幸蒙吏人下垂訊生憎米雜兼潮潤可憐
米亦不能言風篩敢忤當官令挑剔備嘗許入廩猶道
風篩未盡淨廩上家人氣燄張狐裘蒙茸閃有光不識
鉤輒作何語樣盤上下如梭忙大斛眈眈雄似虎半空
飛出恣攫取淋尖踢腳無不爲四圍拋灑白於雨心頭
剗卻塊塊肉酸到心頭那敢怒一石祇餘一斛強餘米
責令三日補米不足數串不給追呼似逐逃亡戶近鄉
遠鄉毋稍緩懸牌已報倉廩滿特開折色便民間試較
民間價無算價無算樂若何持籌日日厭笙歌作官江

南好卒歲得寶多忽焉幫丁蠶而起年年舊費增無已
生憎米雜兼潮潤依樣葫蘆相摘指郵民又郵丁丁民
本同仁行月坐月糧有額津貼又加額外銀丁言邇來
輸挽苦添夫開剝增無數過淮抵通需索繁官不我憐
誰與語語官卽如去年冬糧艘渡河陟遭風身家性命
俱險絕米珠擲向洪濤中至今魂夢時作悸賠償未了
公門累曉曉衆口合一詞停兌願甘就死地冬兌冬開
例有期羽檄催償如星馳視漕使者兼程至我我大艦
揚旌旗厨傳絡繹伺水次饗餼鼎簋漿醴醢嚮晨高坐
倉廳上官與幫丁互詰抗使者通達老於事但責官丁

各獻狀有米無銀愁煞人朝來減折殫催征米防色變
期防誤至此官難脣舌爭惟祝挂帆掃幫去黃梁夢醒
兩袖輕大官火速提漕項餘者又須充兵饒仙人妙手
亦空空無奈挪移到 國帑吁嗟乎南漕之弊不盡此
我作歌行告輸使累官累丁尙可言哀我耕田者赤子

財賦補

恩減蘇松賦額紀事 二首

彭啟豐

揚州之田稱下下官田賦重天下寡辛苦輸將四百年
農夫在邑吏在野 天子曰咨問司農頻年軫念惟蘇
松貸爾積逋弛爾正供偕爾父子同時雍

老農聞 詔歌且泣官租特減卅萬石饑者得舖勞者
息向年吏胥頻下鄉賣絲糶穀不得償今年努力輸將
早大家小戶逋租少繼今安穩釋煩哉更願官清無雜
耗